



*Senen, 04 Desember 2023*  
**Ogen: Markus 9:14-24**



**Tek nge Aku!**



**A**nak-anak si sehat em perayaken orang tua. Palas kerina sinilakoken orang tua tujunna man anak entah sinusurna. E maka la erlatih-latih erjuang guna si e. Tapi uga kune anak e sakit? Jadi perbeben si mberat, maun terbelas “madin aku sakit segelah anakku sehat.” Kata enda nuriken isi pusuh maka ana-anakta sehat min kerina.

Sekali jadi lit me orang tua si mindo man ajar-ajar Tuhan Jesus segelah notoken anakna iseluki setan, seh maka lanai banci ngerana. Kulana idampes-dampeskenna ku taneh, babahna rugup-ugup, ipenna erderik ras dagingna mekeng. Si enda enggo rusur jadi man anak e. Lanai siat ukur orang tua natapsa. Kuja pe ibabana segelah jumpa tambar. Sekali jadi ibaba me ku Jesus. Ajar-ajar Jesus si ndube ijumpai la nggasup guna mpelawes pinakit e i bas anak e nari. Tupung jumpa ras Jesus, orang tua alu meseksek mindo segelah anak e madan. Iturikenna kerina kecibal anak e man Jesus. Enggo rusur anak e menam mate erkiteken perbahanen setan, e maka nina “mekuah min ateNdu, sampati min kami.” Megi si e ipetetap Jesus ukurna segelah bapa orang tua enda tek, kai pe banci jadi man kalak sierkinitenken. Ialoi orang tua enda me kata Jesus e alu ngataken “tek nge aku!, tapi kinitenkenku langga cukup. Sampati min aku bas kinitenkenku si kurang.”

Teridah maka orang tua e la pernah putus asa entah jera i bas erpengarapen. I bas baban mberat sinialokenna e tek ia man kuasa Dibata e. Pengarapenna e erbahanca jumpa ia ras tanda sengget silakoken Jesus nandangi anak siikelengina. Sehat anak e, malem pinakitna, nambahi kinitenkenna. Lit kata bijak ngataken maka “*harapan adalah pendamping kekuattan, dan ibu dari kesuksesan, untuk yang sangat berharap memiliki dalam dirinya karunia mujizat*” (Samuel). Tetap tek nandangi kuasa Dibata erbahanca siidah me tanda sengget e.

☞ “Kinitenken man Dibata la erbahanca kecewa”

